

**ЎЗБЕКИСТОН РЕСПУБЛИКАСИ СОҒЛИҚНИ САҚЛАШ ВАЗИРЛИГИ
ТОШКЕНТ ФАРМАЦЕВТИКА ИНСТИТУТИ**

**“АХБОРОТ СОАТИ”
МАТЕРИАЛЛАРИ**

**Ҳафтанинг ижтимоий – сиёсий воқеалари
(2015 йил 30 ноябр –5 декабр гача)**

№13

Тошкент – 2015



**Президент Ислам Каримовнинг Ўзбекистон Республикаси Конституцияси
қабул қилинганининг 23 йиллигига бағишланган тантанали маросимдаги
маърузасининг қисқача мазмуни**

1992 йил 8 декабрда қабул қилинган мамлакатимизнинг Асосий Қонуни — Ўзбекистон Республикаси Конституцияси бугунги кунда ҳаётимизда қандай улкан, ҳал қилувчи ўрин тутаётгани ҳақида ортиқча гапиришнинг ҳожати йўқ, деб юртбошимиз.

Конституциямиз бугунги кунда юртимизда мустақил, суверен демократик давлат барпо этиш, кўп укладли бозор иқтисодиёти таркибида хусусий мулк устуворлигини мустаҳкамлаш ва унинг ҳимоясини кафолатлаш, шунингдек, инсон манфаатлари, ҳуқуқ ва эркинликлари олий қадрият ҳисобланган фуқаролик жамиятини шакллантиришнинг асосий ҳуқуқий ва қонунчилик пойдеворига айланди. Конституция ва унинг асосида яратилган қонунчилик базаси, шунингдек, 2010 йилда қабул қилинган Мамлакатимизда демократик ислохотларни янада чуқурлаштириш ва фуқаролик жамиятини ривожлантириш концепцияси, 2011 ва 2014 йилларда Бош қомусимизга киритилган тузатишлар жамиятимизни ислоҳ этиш, демократлаштириш ва либераллаштириш, мамлакатимизни модернизация қилиш ва туб таркибий ўзгаришларни амалга ошириш бўйича пухта ўйланган, узоқ муддатга мўлжалланган, дунёда тараққиётнинг “ўзбек модели” деб тан олинган дастур асосини ташкил этди. Айни шу модель замонавий, жадал ва барқарор ривожланиб бораётган давлатнинг шаклланишида мустаҳкам пойдевор бўлиб хизмат қилди, десак, ҳеч қандай муболаға бўлмайди.

Дунёдаги санокли давлатлар қаторида Ўзбекистонда мустақил тараққиёт йилларида иқтисодиёт қарийб 6 баробар, аҳоли жон бошига тўғри келадиган реал даромадлар 9 баробардан зиёд ўсди.

Кейинги 11 йилда, жумладан, жорий 2015 йилда ялпи ички маҳсулотнинг ўсиш суръатлари барқарор равишда 8 фоиздан юқори бўлиб келмоқда, макроиқтисодий кўрсаткичлар мутаносиблиги, давлат бюджети ва тўлов балансининг барқарор равишда профицит билан бажарилиши, экспорт ва олтин-валюта захираларининг ўсиши таъминланмоқда. Давлатнинг ташқи қарзи эса ялпи ички маҳсулотга нисбатан 18,5 фоиздан ошмаяпти.

Жорий йилда иқтисодиётимизга қарийб 16 миллиард доллар қийматидаги инвестиция киритилди ва бу асосий фондлар умумий ҳажмининг салкам 23,3 фоизини ташкил этади.

Ўтган 5 йил давомида иқтисодиётимизга жами бўлиб қарийб 67 миллиард доллар инвестиция йўналтирилди, бунинг 21 фоиздан ортиғи хорижий инвестициялардир.

Янги корхоналарни ишга тушириш ва фаолият кўрсатаётган объектларни модернизация қилиш, кичик бизнес ва хусусий тадбиркорликни жадал ривожлантириш ҳисобидан юртимизда фақат охириги 5 йилнинг ўзида 5 миллионга яқин янги иш ўрни яратилгани биз учун ниҳоятда муҳим бўлган масалани ечишда катта амалий қадам бўлди.

Мамлакатимизда амалга оширилаётган кенг кўламли ўзгаришларнинг ҳал қилувчи омили ҳақида гапирганда, аввалоодамларимизнинг **онгу тафаккурида рўй бераётган туб ўзгаришлар, уларнинг ён-атрофдаги воқеаларга муносабати, дахлдорлик ҳисси, сиёсий фаоллиги ва фуқаролик позицияси тобора ўсиб бораётганини таъкидлаш лозим.**

Шу борада, ҳеч шубҳасиз, ўз вақтида, яъни бундан 18 йил олдин Кадрлар тайёрлаш ва шунингдек, Мактаб таълимини ривожлантириш умуммиллий дастурларини қабул қилганимиз таълим-тарбия соҳасида эски қолип ва асоратлардан холи бўлган, бугун ўзгаларнинг ҳавасини тортаётган янги тизимни ҳаётимизда татбиқ этганимиз ҳақиқатан ҳам тарихий бир воқеа бўлди, десак, адашмаган бўламиз.

Бунинг натижасида **мустақил ва янгича фикрлайдиган, замон талабига жавоб берадиган авлодни шакллантиришга эришдик, Ватанимизнинг эртанги кунини, тақдирини ўз қўлига олишга қодир бўлган фарзандларимиз бугун минбарга чиқмоқда.**

Янги — 2016 йил ва келгуси йиллар амалга ошираётган ислохотларимизни янада чуқурлаштириш ва уларнинг самарасини кучайтиришда янада юксак босқич бўлади, деб айтишга тўла асосимиз бор.

Шуни айтиш керакки, бу йўлда бизнинг олдимизда турган асосий вазифамиз — бошлаган ислохотларни мантикий якунига етказиш, эскича қарашлардан, ўз умрини ўтаб бўлган бошқарув усулларидан бутунлай воз кечишдир. Бунинг тасдиғи сифатида шу йилнинг 5-6 ноябрь кунлари Тошкент шаҳрида ўтказилган Халқаро инвестиция форумини эсга олишимиз ўринли бўлади. Ушбу анжуманда Ўзбекистонда амалга оширилаётган ислохотларга хорижий инвесторларнинг ишончи тобора ортиб бораётгани яққол намоён бўлди. Унда дунёнинг ривожланган 33 та давлатидан нуфузли фирма ва компанияларнинг 560 дан зиёд вакили, шунингдек, етакчи халқаро молия институтлари раҳбарлари иштирок этди. Форум якуни бўйича умумий қиймати 12 миллиард доллардан зиёд инвестиция битимлари имзоланди.

Яна бир муҳим вазифамиз қонун ижодкорлиги фаолиятини прогноз қилиш ва режалаштириш бўйича самарали тизим яратишдан иборатдир. Бу биз учун асосий марраларимиздан чалғимасдан, реал ҳаётдан узоқлашмасдан, нафақат давлат бошқаруви, иқтисодий тараққиёт соҳасидаги аниқ вазифаларни ҳал этишда, балки асосий мақсадимиз бўлган ҳуқуқий демократик давлат қуришни изчил амалга оширишда қандай қонунлар қабул қилишимиз кераклигини аниқ белгилаш имконини беради. Бугунги кунда ана шу йўналишда кўплаб ишлар қилинмоқда, аммо даврнинг ўзи, янги конституциявий шароитлар бу борадаги ишларни ҳар томонлама пухта ишлаб чиқилган ҳуқуқий қонунчилик асосида ташкил этиш ва бажаришни тақозо этмоқда. “Парламент назорати тўғрисида” ва “Жамоатчилик назорати тўғрисида”ги қонунларнинг тезроқ қабул қилиниши кўп жиҳатдан ана шу вазифаларни ҳал этиш имконини беради.

Конституциямизда бизнинг бош мақсадимиз — **фақат ҳуқуқий демократик давлат эмас, балки адолатли жамият қуриш экани аниқ-равшан белгилаб берилган.** Бу мақсад ҳаётимизда мустаҳкам қарор топган оддий ҳақиқатдан, **яъни халқимиз ҳар қандай қийинчиликка чидаши мумкин, аммо адолатсизликка чидай олмайди, деган сўзларни яққол тушунишдан келиб чиққан,** десам, ўйлайманки, бутун эл-юртимизнинг фикрини ифода этган бўламан.

Ўзбекистондаги бугунги аҳволни дунёдаги бошқа давлатлар билан қиёслаб, солиштирганда кўп нарса аён бўлади. Шу нуқтаи назардан қараганда, АҚШда фаолият кўрсатаётган, катта обрўга эга бўлган, Гэллап институти деб ном олган ижтимоий фикрни ўрганиш маркази томонидан “Қонуний тартибларга итоат қилиш индекси” деган мавзуда 2015 йилда ўтказилган ва эълон қилинган тадқиқот материаллари билан танишиш айтиш муддао бўлур эди.

Ушбу нуфузли ташкилот шу йўналиш бўйича ўз хулосасини чиқариш учун жаҳон миқёсида 141 та мамлакатда сўров ўтказиб, қатта ёшдаги 142 минг шахсинг фикрини ўрганган. Сўровномада 3 та савол ўртага қўйилган. Биринчи савол “Сиз ўзингиз яшаётган шаҳар ёки тумандаги маҳаллий полицияга ишонасизми?” деган мазмунда берилган. Иккинчи савол: “Сиз ўзингиз яшаётган шаҳар ёки туманда кечаси хавф-хатардан қўрқмасдан ёлғиз юра оласизми?”. Ва учинчидан, “Охирги ўн икки ойда сиз ва оила аъзоларингизнинг пул ва мол-мулки ўғирланган ҳолат содир бўлганми?” деган савол берилган. Айти мана шундай саволлар орқали, авваламбор, сўров ўтказилган мамлакатда яшаётган ҳар қайси одамнинг кайфиятига, унинг ўзини эркин ҳис этишига қонунда белгиланган тартибларга амал қилиш қандай таъсир кўрсатаётганини аниқлаш кўзда тутилган.

Бизнинг мамлакатимиз, Ўзбекистонимиз, бу сўровнома натижаларига кўра, дунёдаги 141 та давлат орасида 2-ўринни эгаллаганини алоҳида мамнуният билан таъкидлаш лозим. Бизнинг бундай ўта муҳим масала, яъни юртимизда тинч ва осуда ҳаётни асраш ва ҳимоя қилиш бўйича мана шундай юксак даражага кўтарилганимиз, бу соҳада олиб бораётган ишларимиз халқаро миқёсда кенг эътироф этилгани, ҳеч шубҳасиз, барчамизга ғурур ва ифтихор етказди.

Бу ҳақда гапирганда, халқимизнинг тинчлиги ва осойишталигини, энг асосийси, одамларимизнинг ҳаётдан розилигини, эртанги кунга ишончини янада мустаҳкамлаш ўта муҳим аҳамиятга эга эканини ҳисобга олган ҳолда, бу масала бундан буён ҳам эътиборимиз марказида туришини унутмаслигимиз зарур.

Ҳурматли дўстлар!
Ҳеч кимга сир эмас, шуни ҳам тан олишимиз керак — кундалик ҳаётимизда ҳали-бери қонунга риоя қилмаслик, қонун ва қонунийликнинг, адолат мезонларининг амалда қўпол равишда бузилиши, ҳуқуқни муҳофаза қилувчи ва назорат органлари томонидан ўз бурчига совуққонлик билан қараш қонунбузарликка олиб келиши билан боғлиқ ҳолатлар, афсуски, кам эмас.
Бу — ҳақиқат ва ундан кўз юмиб бўлмайди.

Шу фурсатдан фойдаланиб, бу борада айрим мисолларни олиб келмоқчиман. Ушбу масала бўйича ўтказилган баъзи таҳлиллар шундан далолат берадики, жорий йилнинг тўққиз ойи давомида фуқароларимиздан ҳуқуқни муҳофаза қилувчи ва назорат органларининг мансабдор шахслари устидан келиб тушган 500 га яқин шикоятнинг бештадан биттаси ички ишлар органлари ходимларининг ноқонуний хатти-ҳаракатларига тегишлидир.

“Ишонч телефон”лари орқали адлия идораларига қилинган мурожаатларнинг 96 фоизи қаноатлантирилган, аризаларнинг 4 фоизини қаноатлантириш рад этилган. Бу рақамлар нимадан далолат беради? Шикоят билан мурожаат қилган одамларнинг у ёки бу давлат органлари қарорларидан норози бўлишга тўла ҳақли эканидан далолат беради.

Барчамизга маълум, бир йил олдин мана шу муҳташам залда сиз, азизлар билан маслаҳатлашиб, 2015 йилни юртимизда “Кексаларни эъзозлаш йили” деб эълон қилган эдик. Бизнинг бундай қарорга келишимиздан асосий мақсад — бугунги фаровон ҳаётга эришишда муносиб ҳисса қўшган кекса авлод вакилларининг иззат-ҳурматини жойига қўйиш, муҳтарам фахрийларимизнинг руҳини, кўнглини кўтариш, улар учун қўшимча қулайликлар яратиш йўлида олиб бораётган ишларимизнинг самарасини оширишдан иборат бўлиб, айна шундай муҳим вазифаларни ўз олдимизга қўйган эдик.

Бугун, мана шу фурсатдан фойдаланиб, ана шундай олижаноб мақсадларга қаратилган, амалга оширган ишларимиз якуни билан сиз, азизларни таништириш, қисқача ҳисобот беришни зарур, деб биламан. Бу борада биринчи навбатда ёлғиз қариялар, пенсионер ва ногиронларни ижтимоий муҳофаза қилиш тизимини янада мустаҳкамлаш ва ривожлантиришнинг давлат дастури қабул қилингани ва бу йўналишда 5-6 йилга мўлжаллаб режалаштирилган ишларимиз айниқса эътиборга сазовор, деб ҳисоблайман. Хонадонларимизнинг кўрки бўлган кексаларимизни моддий қўллаб-қувватлаш мақсадида шу йилнинг ўзида 2 миллион 750 минг нафар отахон ва онахонларимизнинг пенсия миқдори 20 фоиздан зиёд кўпайтирилиб, уларга давлат бюджети ҳисобидан 12 триллион 888 миллиард сўм пенсия тўлангани, ўз вақтида ва узлуксиз етказиб берилганини алоҳида таъкидлаш жоиз.

Бу ҳақда гапирганда, бугунги кунда давлатимиз пенсияга ажратадиган маблағнинг миқдори дунёдаги камдан-кам давлатлар қаторида ўртача ойликнинг 41 фоизидан зиёдини ташкил этишини яна бир бор айтиб ўтмоқчиман. Жорий йилда 1941 — 1945 йиллардаги урушда қатнашган ва фронт ортида хизмат қилган 61 мингдан ортиқ фахрийларимизга коммунал хизматлар бўйича 3 миллиард 900 миллион сўм миқдоридаги компенсация пуллари тўлаб берилди. Шунингдек, 100 ёшга етган ва ундан ошган кексаларимизнинг пенсиясига энг кам иш ҳақининг 100 фоизи миқдорида устама тўлаб бориш тизими татбиқ этилди ва шу каби бир қатор бошқа чора-тадбирлар амалга оширилди.

215 мингдан зиёд отахон ва онахонларимиз чуқур тиббий кўриқдан ўтказилиб, уларнинг саломатлигини тиклашга кўмак берилди.

Ўтган йили қабул қилган қароримизга мувофиқ, 50 мингдан ортиқ уруш ва меҳнат фронти фахрийлари, пенсионер ва ногиронлар санаторийларда бепул даволанди.

Уларнинг 7 минг нафарига ихтисослаштирилган тиббий ёрдам кўрсатилди, 5 мингдан кўпроқ қарияларимиз учун замонавий клиникаларда операциялар ўтказилиб, улар ўз дардига шифо топди.

Табиийки, бу борада соғлиқни сақлаш тизимининг моддий-техника базасини мустаҳкамлаш, тиббий хизматнинг сифатини давр талаблари даражасига кўтариш алоҳида аҳамият касб этади.

Жорий йилда Инвестиция дастури асосида 141 та тиббиёт муассасасида қарийб 495 миллиард сўм хажмидаги реконструкция ва таъмирлаш ишлари амалга оширилгани, уларни замонавий диагностика ва даволаш асбоб-ускуналари билан жиҳозлаш учун хорижий молия институтларининг 25 миллион долларлик маблағлари жалб этилгани айтиш мақсадга хизмат қилади. Шулар қаторида “Турон”, “Ҳавотоғ гулшани”, “Чимён”, “Ситораи Моҳи Хоса”, “Косонсой”, “Нуроний”, “Товоксой”, “Тахياتош”, “Маржон суви” санаторийларида, шунингдек, Тошкент ва Сирдарё вилоятларидаги Саховат уйларида қарийб 40 миллиард сўмлик қурилиш, реконструкция ва капитал таъмирлаш ишлари амалга оширилганини айтиш ўринлидир.

Албатта, “Кексаларни эъзозлаш йили” Давлат дастури доирасида амалга оширган ишларимиз ҳақида яна узоқ гапириш, кўплаб рақам ва мисолларни олиб келиш мумкин. Лекин уларни мухтасар ифода қиладиган бўлсак, дастур бўйича барча манбалар ҳисобидан **2 триллион 246 миллиард сўм ва 225 миллион АҚШ долларидан зиёд маблағ сарфлангани бу борадаги ишларимизнинг кўлами ва миқёсидан яққол далолат беради, деб ўйлайман.**

Мухтарам

юртдошлар!

Энди сиз, азизлар билан, юртимизда шаклланган анъанамизга кўра, кириб келаётган янги — 2016 йилга қандай ном бериш ҳақида маслаҳатлашиб олишимиз керак. **Соғлом бола соғлом ва аҳил оиланинг меваси бўлиб, фақатгина соғлом онадан соғлом бола туғилади.** Асрлар давомида ўз тасдиғини топган бу ҳақиқатни тушунтириб, изоҳлаб ўтиришнинг ҳожати йўқ, деб ўйлайман. Ана шундай муҳим ҳаётий қадриятни жамиятимизда янада чуқур қарор топтириш, соғлом ва баркамол авлодни тарбиялаш борасидаги ишларимизни янада юксак босқичга кўтариш мақсадида мен кириб келаётган янги — 2016 йилни юртимизда **“Соғлом она ва бола йили”** деб эълон қилишни таклиф этаман.

Ер юзида ҳаёт пайдо бўлибдики, одамзод мўътабар она сиймоси олдида ҳамиша таъзим қилади. Муборак ҳадислардаги “Жаннат — оналарнинг оёғи остидадир” деган сўзлар ҳам ана шу юксак меҳр ва эҳтиромнинг ёрқин ифодасидир.

Аёлларга шарқона эҳтиром ва эъзоз кўрсатиш — биз учун ота-боболаримиздан қолган ибратли мерос бўлиб, биз бундай анъаналаримизга доим содиқ бўлиб яшаймиз. Биз мустақилликка эришганимиздан сўнг соғлом ва баркамол авлодни вояга етказиш, биринчи навбатда, оила, оналик ва болаликни ҳимоя қилиш масаласини ўзимиз учун энг муҳим, устувор вазифа сифатида белгилаб олдик. Бу соҳада зарур ҳуқуқий-меъёрий базани такомиллаштириш, миллат генофондини яхшилаш, аҳолининг ҳаёт даражаси ва сифатини ошириш борасида қандай улкан ишларни амалга оширганимиз барчамизга яхши маълум, албатта.

Ана шу йўналишдаги кенг кўламли ишларимизнинг давоми ҳақида гапирганда, биргина мисол келтиришни жоиз, деб биламан. Бугунги кунда Тошкент шаҳрида Жанубий Корея давлатининг беғараз ёрдами билан қиймати 130 миллион 600 минг доллар бўлган кўп тармоқли замонавий болалар шифохонасининг қурилиши бошланди. Бу мажмуанинг — Мустақил Давлатлар Ҳамдўстлиги мамлакатлари ҳудудида ягона бўлган, тўртинчи, яъни энг юқори даражага эга ноёб тиббиёт масканининг яқин келгусида фойдаланишга топширилиши соғлом авлод тарбияси йўлида улкан қадам бўлиши шубҳасиздир.

“Соғлом она ва бола йили” Давлат дастурини ишлаб чиқишда, аввало, юртимизда оила, оналик ва болаликни ҳимоя қилиш бўйича шаклланган ҳуқуқий-меъёрий базани такомиллаштириш масаласи эътиборимиз марказида бўлиши лозим.

Юртимизда қиз болаларнинг — бўлғуси оналарнинг ҳам жисмоний, ҳам маънавий соғлом бўлиб вояга етиши, уларнинг ўрта мактабдан сўнг лицей ва коллежларда албатта таълим олишини таъминлаш, замонавий билим ва касб-хунарларни эгаллаши бугунги кунда давлат сиёсати даражасига кўтарилган. Мен бу ҳақда такрор ва такрор гапиришни ўзимнинг бурчим деб биламан. Қиз болани коллежни битирмасидан, ҳунар эгалламасидан туриб, кимки турмушга бермоқчи бўлса, билиб қўйинглари, буни мен узоқни кўрмаслик, калтабинлик деб ҳисоблайман. Қиз бола, аввало, касб эгалласин, ўз фикрига эга бўлсин, ҳаётни англасин. Шундан кейин у ҳаётда ўзининг муносиб ўрнини топади, жамиятимизнинг фаол аъзосига айланади, эртага у қурадиган оила ҳам мустаҳкам бўлади. Бу менинг энг катта орзуим ва тилагимдир, десам, айти ҳақиқатни айтган бўламан. Шу нуқтаи назардан қараганда, дастурда коллеж битирувчиларини, биринчи навбатда, қизларимизни иш билан таъминлаш масаласини долзарб вазифа тариқасида кўришимиз даркор.

“Она ва бола соғлом бўлса, оила бахтли, оила бахтли бўлса, жамият мустаҳкам бўлади” деган ҳаётбахш ғоя ҳар бир юртдошимизнинг қалбига чуқур кириб бориши, ана

шу улуг ишга муносиб ҳисса кўшиш барчамизнинг муқаддас вазифамизга айланиши лозим.

Президентимиз ўз нутқларини яна бир бор барчани Конституциямиз қабул қилинганининг 23 йиллиги билан яна бир бор табриклаб, барчангизга сихат-саломатлик, бахт ва омад, хонадонларига файзу барака тилаб якунладилар.

Президентимиз Ислом Каримов 5 декабрь куни Оқсаройда бир гуруҳ юртдошларимизга Ватанимизнинг юксак мукофотларини топширди.

Давлатимиз раҳбарининг фармонларига мувофиқ, Ўзбекистон Республикаси мустақиллигининг 24 йиллиги арафасида мамлакатимизни ҳар томонлама ривожлантиришга катта ҳисса кўшган, эл-юртимиз тинчлиги ва осойишталигини мустаҳкамлашда фидойилик кўрсатган, жамиятимизнинг ижтимоий-иқтисодий, илмий-техник ва маънавий-маърифий ҳаётида алоҳида эътиборга сазовор бўлган бир гуруҳ юртдошларимиз давлат мукофотлари — фахрий унвонлар, орден ва медаллар билан тақдирланган эди.

Оқсаройда 5 декабрь куни ана шу юксак мукофотларни тантанали топшириш маросими бўлди.

Тақдирланганлар номидан сўзга чиққан Ўзбекистон Қаҳрамони, “Нуроний” жамғармасининг Андижон вилояти бўлими раиси Таваккал Топволдиев, Ўзбекистон Республикаси халқ артисти, Муқимий номидаги ўзбек давлат мусиқий театри актёри Мирзажон Азизов, Ўзбекистон Республикасида хизмат кўрсатган артист, Ўзбекистон академик рус драма театри актёри Олег Галахов, Ўзбекистон Республикасида хизмат кўрсатган фуқаро авиацияси ходими, “Ўзбекистон ҳаво йўллари” Миллий авиакомпанияси бош директорининг ўринбосари Геннадий Харлап, “Эл-юрт хурмати” ордени соҳиби, Қорақалпоғистон Ёзувчилар уюшмаси раиси Кенес Каримов, “Эл-юрт хурмати” ордени соҳиби, “Давсувхўжаликназорат” инспекциясининг Хоразм вилояти бўйича инспектори Кенжабой Ортиқов, “Шухрат” медали соҳиби, “Камолот” ёшлар ижтимоий ҳаракатининг Сурхондарё вилояти Кенгаши қошидаги “Ёшлар маркази” тўғарак раҳбари Нафосат Курбонова, “Шухрат” медали соҳиби, бокс бўйича Ўзбекистон ёшлар терма жамоаси аъзоси Бектемир Мелиқўзиев давлатимизнинг ушбу юксак мукофотлари уларга янада куч-ғайрат бағишлашини, Ватанимиз тараққиёти йўлида янги марраларни эгаллашга ундашини таъкидлади, юксак эътибори ва ғамхўрлиги учун Президентимиз Ислом Каримовга самимий миннатдорлик билдирди.

Ноябрь ойи охирида еврохудудда инфляция даражаси кутилмаганда ўтган йилнинг шу давридагига нисбатан 0,1 фоиз пасайди, дейлади “Евроньюс” телеканали хабарида.

Экспертларнинг фикрича, бу ҳолат иқтисодиёт ҳамда истеъмол талабининг сустлиги билан боғлиқ. Гап шундаки, ягона валюта бирлигига аъзо давлатларда чакана савдо ҳажми Европа Марказий банки (ЕМБ)нинг 2 фоизлик мақсадли кўрсаткичидан анча кам.

Ҳозир ЕМБ ҳар ойда активлар ва облигациялар сотиб олиш учун 60 миллиард евро миқдорида маблағ сарфламоқда. Бу борада ишлаб чиқилган дастурнинг амал қилиш муддати кейинги йилнинг сентябригача мўлжалланган бўлиб, молия муассасаси шароитга қараб унинг муддатини узайтириши ҳам мумкин.

2-5	декабрь	кунлари
Илғор	технологиялар	кўрғазмаси
Япония пойтахти Токио шаҳрида робот техникаларининг “iREX — 2015” халқаро кўрғазмаси		очилди.
Тўрт кун давом этадиган ушбу тадбирга 150 мингга яқин киши ташриф буюриши кутилмоқда. Соҳа ихлосмандлари 300 га яқин компания экспонатлари билан танишишлари		мумкин.
Кўрғазмада намоиш қилинаётган мижоз билан мулоқотга кириша оладиган сервис машиналари, кўринишидан тирик инсонга ўхшаб кетадиган андронидлар кўпчиликда катта қизиқиш		уйғотаяпти.

МАДАНИЯТ ЯНГИЛИКЛАРИ

2015 йилнинг 5 декабрида

Ўзбек миллий академик драма театрида “Кексалар куйлаганда” деб номланган адабий-бадиий кеча ташкил этилди. Шу муносабат билан бу ерга нуруний отахону онахонлар, санъат мухлислари, жамоатчилик вакиллари, ижодкорлар, ёшлар таклиф қилинди.

“Кексаларни эъзозлаш йили” деб номлангани ҳамда шу асосда қабул қилинган Давлат дастурига мувофиқ, кўплаб ибратли ишлар амага оширилаётгани фикримиз исботидир.

Маданият ва спорт ишлари вазирлиги Республика халқ ижодиёти ва маданий-маърифий ишлар илмий-методик маркази томонидан Халқаро “Олтин мерос” хайрия жамоат фонди, “Ўзбектеатр” ижодий-ишлаб чиқариш бирлашмаси ҳамда Ўзбек миллий академик драма театри ҳамкорлигида ўтказилган мазкур тадбир ана шундай эзгу саъй-ҳаракатлар ифодаси бўлди.

Устоз санъаткорларнинг пурмаъно кўшиқларини соғинган мухлислар кўнглида кўтаринкилик уйғотиш, “Устоз — шогирд” анъаналарини давом эттириш мақсадига қаратилган кечада Ватан, ота-она, муҳаббат, меҳр-оқибат каби мавзулар тараннум қилинди. Айниқса, Ўзбекистон халқ ҳофизи Маҳмуджон Тожибоев ва Ўзбекистон халқ артисти Хайрулла Лутфуллаев ҳамда Ўзбекистонда хизмат кўрсатган артист Икромжон Бўронов ва хушовоз хонанда Ҳожиакбар Ҳамидов томонидан ижро этилган кўшиқлар гулдурас олқишлар билан кутиб олинди.

СПОРТ ЯНГИЛИКЛАРИ

02/01/2015

Ўзбекистон Хотин-қизлар кўмитаси, Маданият ва спорт ишлари, Халқ таълими вазирликлари, Гимнастика федерацияси, “Камолот” ёшлар ижтимоий ҳаракати, Болалар спортини ривожлантириш жамғармаси ҳамда бошқа ташкилотлар ҳамкорлигида ташкил этилган тадбирда Тошкент шаҳри ва вилоятининг 29 жамоасидан 348 киши қатнашди. Улар 10 ёшгача бўлган қизлар ҳамда 50 ёшдан ошган уй бекаларидир. Шу куни мамлакатимизнинг бошқа ҳудудларида ҳам мазкур шиор остида ўтказилган баҳсларда икки мингга яқин иштирокчилар ўз маҳоратини намойиш қилди. Мамлакатимизда жисмоний тарбия ва спортни оммалаштириш бўйича кенг кўламли ишлар амалга оширилаётгани алоҳида таъкидланди. Хусусан, ҳар йили шаҳару қишлоқларимизда замонавий спорт мажмуалари, стадионлар, сузиш ҳавзалари барпо этилаяпти. Улар зарур инвентар ҳамда жиҳозлар, малакали кадрлар билан таъминланмоқда. Турли ёш тоифалари, ҳаваскорлар, профессионаллар ўртасида кўплаб спорт беллашувлари мунтазам ўтказилаётир. Буларнинг барчаси эртамик эгаларининг баркамол бўлиб вояга етиши, аҳоли ўртасида соғлом турмуш тарзи мустаҳкам қарор топишида муҳим омил бўлиб хизмат қилаяпти. Бинобарин, юртимизда спорт гимнастикаси, бадий гимнастика, трамполин, акробатика ва бошқа спорт турлари ҳам жадал ривожланмоқда. Айни пайтда республикамизда бир

миллиондан зиёд хотин-қизлар жисмоний тарбия ҳамда спорт билан шуғулланаётгани, уларнинг беш юз минг нафарга яқини қишлоқ жойларда экани диққатга сазовордир. Ўз навбатида, жорий йилнинг ўн бир ойи давомида қизларимизнинг 65 нафари гимнастика турлари бўйича Осиё ҳамда жаҳон чемпионатлари, турли халқаро беллашувларда ғолиб ва совриндорлар қаторидан жой олгани барчамизни қувонтиради. “Гимнастика барча учун” спорт мусобақаси иштирокчилари рақс ҳамда гимнастика элементларини ижро этиш бўйича ўз маҳоратларини кўрсатишди. Яқунда пойтахтимизнинг Шайхонтоҳур ва Тошкент вилоятининг Бекобод тумани жамоаси биринчи ҳамда иккинчи ўринларни эгаллаган бўлса, Учтепа тумани жамоаси учинчи ўриндан жой олди. ўолиб ва совриндорларга эсдалик совғалари топширилди. Тадбирнинг очилиш маросимида Ўзбекистон Республикаси Бош вазирининг ўринбосари, Республика Хотин-қизлар кўмитаси раиси Э. Боситхонова сўзга чиқди.

“Ахборот соати” раҳбари

Тугалов А.